

## Jahresbericht 2006

*Liebi Gwärblerinnen und liebi Gwärbler*

Di beschti Nachricht voräväg:

Aagsichts vo dä guete Wirtschaftlaag nimmt dä KMU-Zug wiiter a Fahrt uuf!

Und di nöd so guet Nachricht grad hindedrii:

Au jetzt und in Zuekunft isch dä Erfolg vo euis KMU immer ganz direkt mit Chrampfe verbunde. Aber das isch Ihne wahrscheinlich scho sälber uufgfallä...

Mini sehr verehrte Damen und Härre

Di gueti Wirtschaftslaag, akzeptabli Erträg und ä stabili Personalsituation bi mene grosse Lehrstellaangebot charakterisiert die aktuell Situation.

Au wänn ä Branche übergreifendi Analyse vo dä wirtschaftliche Situation nume schwer möglich isch und branchspezifischi Unterschied üblich sind, chann gsamtheitlich vonere positive Stimmig im Gwerb gredt werde! Die Uussag dörf jedoch nöd drüber hinweg tüsche, dass i dä KMU nach wie vor um dä Undernämensgwünn g'kämpft werde muess! Dä allgegewartigi Priisdruck und d'Erwartige vo de Konsumänte, dass d'Leischtig möglichscht „billig“ statt „prieswert“ = dä Priis wärt! aabotte werde müend, unterstützed die unsympathischi Entwicklig.

Lokal tätigi Undernähme werdet au wiiterhin Werbig defür mache müesse, dass lokal i-kaufte Dienschtleistige und Produkt, au wänn sie in priislicher Hinsicht nöd immer mit em Usland konkurriere chönd, anderi Vorteil ufwiised! Spätischens wänn mer mit eme usländische Produkt nöd z'friede isch, schätzt mer d'Vorteil vo lokale Unternämige!

Drum isch au in Zuekunft d'Chundenöchi, dä persönlichi Kontakt, di individuell Berätig, Flexibilität, Fründlichkeit, guet usbildeti und motivierti Lüüt und vor allem die anderi Dienschtleistigsbereitschaft, d'Stärki vo eus Gwerbler!

Im Zug vo däne Igangs erwähnte guete Ussichte zeiged sich übrigens bereits Engpäss bi dä Rekrutierig vom nötige Fachpersonal. D'Nachwuchsförderig und Bildigspolitik generell werdet zum politische Schlüsselgländ, wänn's drum gaht, d'Rahmebedingige für d' KMU z'verbessere! Ohni Fachpersonal und Nachwuchs chönnd d'Entwickligs- und d'Wachstumsmöglichkeit vo dä KMU's nöd oder nur unzureichend genutzt werde! Darum setzt sich d'Lehrstelle-Kommission wiiterhin mit unermüedlichen Isatz und vill Herzbluet für d'Förderig vo Lehrstelle i eusem Bezirk ii.

Dä BGV Dielsdorf angaschiert sich au wiiterhin aktiv und zäme mit em BGV Bülach i dä Flughafefrag. Dä Flughafen Chlote isch und bliibt nach wie vor wichtig für s'umliegende Gwerb und hört nöd a dä Bezirksgränze uf!

Eusi Firabigverastaltige dörf mer mit guetem Gwüsse als richtigi Highlights bezeichne. A dä Erschte Verastaltig mit em Thema „Undernähmensnachfolg“ am 8. Mai 06 händ ca 90 Persone teilgnoo. Bi dä zweite Verastaltig vom 6. Novämber 06 wo sich em vielldiskutierte Thema „neue Lohnuswiis“ gwidmet hätt sind sogar öppe 110 Persone erschiene! Mir wänd die Verastaltige au wiiterhin dureführe! Im Früehlig und im Herbscht werdet die Fierabigsverastaltige mit aktuelle und brisante Theme planet. Sie söllet au in Zuekunft en feschte Bestandteil vom BGV-Jahresprogramm sii und mir hoffed witerhin uf ä glückliche Hand bi dä Wahl vo dä Theme.

Am 16. Novämber 06 händ d'Präsidente vo dä Gwerbverein s'neue BGV-Logo verabschiedet! Das neue Logo begleitet euch übrigens scho sitt em Afang vo dere Delegierteversammlig und ich hoffe, es gfallt Eui allne so guet wie mir!

Mis Amt als Bezirks-Gwerbverband's Präsident dörf ich jetzt bereits sit zwei Jahr uusüebe. Ich han wiederum es sehr lehrrichs und spannends Jahr erlebt. Usserordentlich interessanti Begägnige mit Lüüt us Behörde, Politik und au us dä Wirtschaft entschädiged eim für dä Isatz zu Gunste vom Gwerb!

Im vergangene Jahr sind Gschäft vom BGV a 4 Usschuss-Sitzige und vier Vorstands-Sitzige behandelt worde. Wieter han ich a 7 KGV-Sitzige teilgnoh. Zu mine Pflichte händ no diversi Aläss, wie z.B. Bsuech vo GV's und Gwerbe-Ustellige ghört.

Abschlüssend dörf ich säge, dass dä BGV Dielsdorf sin Platz im Bezirk als vertrauenswürdig Organisation wiiter hätt chöne usbaue und nach wie vor en ernscht gnone Partner für Behörde und Institutione isch. So chönd mir d'Wünsch und Aalige vom Gwerb optimal uf allne Ebene ibringe.

Das alles isch ja kein Wanmän-Schow: ich bedanke mich drum ganz herzlich bi mine Vorstandskollege für ihren Isatz für alli Gwerblerinne und Gwärbler im Bezirk, bim Tobias Juchler für sin spezielle Isatz i verschiedene Scharsche und bi eui allne für die kollegiali und kameradschaftliche Zämearbet. Und ich gange natürlich dävoos, dass ich wieterhin uf eui aktivi Understützig zähle dörf!

Eue Präsident, Jürg Sulser  
Otelfingen, 07. Juni 2007